



Broj: 02-05-719/19
Datum, 26.07.2019. godine

ZAPISNIK
sa 28. redovne sjednice 6. saziva Općinskog vijeća Doboj Istok

Dvadesetosma redovna sjednica 6. saziva Općinskog vijeća održana je dana 29.06.2019. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 15 vijećnika, Kemal Bratić, općinski načelnik, Omer Hadžić, sekretar općine, Enes Bećirović, pomoćnik općinskog načelnika prostornog uređenja i Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Elvir Omerčić, predstavnik Policijske stanice Doboj Istok, Elvir Babić, direktor JKP „ČISTO“ d.o.o. Doboj Istok, Zijad Alibašić, predstavnik JZU Dom zdravlja Doboj Istok, te predstavnik RTV TK.

ODSUTNI: Smajil Hodžić, predsjednik kluba vijećnika NS - BPS i Fajik Muratović, vijećnik SDP.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Otvaram 28. redovnu sjednicu Općinskog vijeća. Na početku selamim načelnika sa pomoćnicima, kolegice i kolege vijećnike i goste. Izostanak su najavili Fajko Muratović i Smajil Hodžić. Molim tehničkog sekretara da nam provjeri prisutnost ostalih vijećnika. Ostali vijećnici su prisutni.“

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu. Ne vidim prijavljenih.“

USVAJANJE ZAPISNIKA SA PRETHODNE SJEDNICE

Dr. Ferid Konjić, predsjedavajući Općinskog vijeća: „ Dobili ste zapisnik sa prethodne sjednice. Ima li primjedbi na zapisnik?“

Selmin Karić, vijećnik SDA: „ Uvaženi predsjedavajući, zamjeniče, načelnice sa saradnicima, kolege i kolegice vijećnici, predstavnici MUP-a, Čista, medija i svi ostali esalamu alejkum i dobar dan. Kod usvajanja zadnje tačke ima tehnička greška kod glasanja gdje stoji za - 14, protiv - 0 i suzdržan - 2. To je ukupno 16 vijećnika, a koliko znam bilo nas je 14 do kraja sjednice i mislim da je bilo za - 12, a sudržanih -2, ali ipak preslušajte audio zapisnik.“

Dr. Ferid Konjić, predsjedavajući Općinskog vijeća: „ Ima li još primjedbi na zapisnik? Ne vidim prijavljenih i dajem na izjašnjavaње. Ko je za zapisnik?“

Glasanje: ZA - 15, PROTIV - 0, UZDRŽANIH - 0.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste dnevni red koji je usvojio Kolegij, a imamo i prijedlog za proširenje dnevnog reda za tri tačke:

1. U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi sljedeća tačka:

Razmatranje i usvajanje prijedloga Odluke kojom se utvrđuje da je od javnog interesa izgradnja priključka zgrade Općine Doboj Istok na magistralni put M-4-009 (dionica Doboj - donja Orahovica, KM 8+800) u Klokočnici u svrhu potpune eksproprijacije zemljišta za izgradnju priključka zgrade Općine Doboj Istok.

Obrazloženje: Razlog za proširenje dnevnog reda je što je potrebno izgraditi kvalitetan prilaz zgradi općine Doboj Istok u Klokočnici, a sljedeća sjednica Općinskog vijeća je krajem mjeseca septembra, ali zbog dobijanja potrebnih saglasnosti i urbanističko-gradevinske dokumentacije potrebno je riješiti što prije imovinsko pravne odnose kako bi imali potrebna dokumenta prije završetka građevinske sezone.

Ima li neko potrebu nešto da kaže? Nema. Ko je za da ide ova tačka na dnevni red?

Glasanje: ZA – 15, PROTIV – 0, UZDRŽANIH – 0.

2. U skladu sa članom 56. Poslovnika o radu Općinskog vijeća Doboj Istok predlažem da se u dnevni red Općinskog vijeća stave sljedeće tačke:

- a) Razmatranje prijedloga Odluke o prihvatanju donacije specijalnog teretnog vatrogasnog vozila i
- b) Razmatranje prijedloga Odluke o određivanju krajnjeg korisnika specijalnog teretnog vatrogasnog vozila.

Obrazloženje: Razlog za proširenje dnevnog reda je što treba što prije staviti u funkciju donirano specijalno teretno vatrogasno vozilo i odrediti krajnjeg korisnika specijalnog teretnog vatrogasnog vozila, a koje će služiti za potrebe zaštite ljudi i materijalnih dobara od prirodnih i drugih nesreća na području općine Doboj Istok. Vremenske prognoze su da će temperature u ljetnom periodu biti iznad normale i očekivati je da se pojavi veći broj požara i potreba za angažovanje tog vozila.

Ima li ko potrebu nešto da kaže? Ako nema, ko je za da ove dvije tačke idu na dnevni red?

Glasanje: ZA – 15, PROTIV – 0, UZDRŽANIH – 0.

Imamo od ranije 8 i ove tri tačke i to će biti ukupno 11 tačaka dnevnog reda. Ko je za predloženi dnevni red?

Glasanje: ZA – 15, PROTIV – 0, UZDRŽANIH – 0.

Usvojen je sljedeći:

D N E V N I R E D

1. Razmatranje i usvajanje prijedloga Odluke kojom se utvrđuje da je od javnog interesa izgradnja priključka zgrade Općine Doboj Istok na magistralni put M – 4 – 009 (dionica Doboj - Donja Orahovica, KM 8+800) u Klokočnici u svrhu potpune eksproprijacije zemljišta za izgradnju priključka zgrade Općine Doboj Istok,
2. Razmatranje prijedloga Odluke o prihvatanju donacije specijalnog teretnog vatrogasnog vozila,
3. Razmatranje prijedloga Odluke o određivanju krajnjeg korisnika specijalnog teretnog vatrogasnog vozila,
4. Razmatranje i usvajanje prijedloga Odluke o usvajanju Akcionog plana za borbu protiv korupcije u općinskoj upravi općine Doboj Istok (2019 – 2021),
5. Razmatranje i usvajanje prijedloga Odluke o zamjeni nekretnina,
6. Razmatranje i usvajanje prijedloga Konačne rang liste za dodjelu stipendija redovnim studentima dodiplomskog studija,
7. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2018/2019. godinu,

8. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata,
9. Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok,
10. Razmatranje zahtjeva Mujić (Vesada) Edisa iz Klokotnice za davanje saglasnosti susjeda,
11. Razmatranje zahtjeva Mujkić (Agana) Adila iz Klokotnice za davanje saglasnosti susjeda.

REALIZACIJA DNEVNOG REDA

Ad. 1. Razmatranje i usvajanje prijedloga Odluke kojom se utvrđuje da je od javnog interesa izgradnja priključka zgrade Općine Doboj Istok na magistralnu cestu M-4-009 (dionica Doboj - Donja Orahovica, KM 8+800) u Klokotnici u svrhu potpune eksproprijacije zemljišta za izgradnju priključka zgrade Općine Doboj Istok.

Dr. Ferid Konjić, predsjedavajući Općinskog vijeća: „ Materijal te dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.2. Razmatranje i usvajanje prijedloga Odluke o prihvatanju donacije specijalnog teretnog vatrogasnog vozila.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu Odluku?“

Glasanje: ZA – 11, PROTIV – 0, UZDRŽANIH – 4.

Ad.3. Razmatranje i usvajanje prijedloga Odluke o određivanju krajnjeg korisnika specijalnog teretnog vatrogasnog vozila.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.4. Razmatranje i usvajanje prijedloga Odluke o usvajanju Akcionog plana za borbu protiv korupcije u općinskoj upravi općine Doboj Istok (2019 – 2021).

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju.“

Kemal Skopljak, vijećnik BPS: „ Pozdravljam sve prisutne. Pošto smo o ovom tekstu raspravljali u nacrtu, pa su bile neke primjedbe i ugrađeno je sve. Sam tekst Odluke je u redu i mi ćemo se truditi maksimalno, a govorim u ime Komisije za borbu protiv korupcije, da sve što je napisano ovdje sprovedemo u djelo. Vi znate kako je teško, a mi smo samo jedan mali djelić u lancu koji treba da se bori protiv ovog zla u našem društvu. Indikativno je samo da vas podsjetim za svo vrijeme od kada sam ja predsjedavajući Komisije za borbu protiv korupcije da ni jedna prijava nije došla do sada. Nevjerovatno je i nemoguće da u Doboj Istoku nema korupcije. Ne znam zašto je narod tako indolentan i ne prijavljuje tu korupciju da mi možemo nešto da poduzmемо, jer mi kao Komisija ne možemo ići i poduzimati nešto na svoju ruku. Znači to je indikativno. Koristim ovu priliku da građane malo podsjetim da imaju kome da prijave korupciju. Sve ovo što je napisano mi ćemo propratiti i sa naše strane nastojati svoj posao da odradimo kako treba. Pošto je bio u nacrtu, a evo sada i u prijedlogu tekst u redu i mi ćemo ga podržati.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.5. Razmatranje i usvajanje prijedloga Odluke o zamjeni nekretnina.

Dr. Ferid Konjić, predsjedavajući Općinskog vijeća: „Materijal ste dobili, dajem tačku na diskusiju. Ne vidim prijavljenih diskutanata i dajem na izjašnjavaње. Ko je za ovu Odluku?“

Glasanje: ZA – 15, PROTIV – 0, UZDRŽANIH – 0.

Ad.6. Razmatranje i usvajanje prijedloga Konačne rang liste za dodjelu stipendija redovnim studentima dodiplomskog studija.

Dr. Ferid Konjić, predsjedavajući Općinskog vijeća: „Materijal ste dobili i stav komisije, tačku dajem na diskusiju.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Selamim i pozdravljam sve prisutne. Pošto nema pitanja, odnosno nema diskusije po ovoj tački, smatram da je Komisija odradila odličan posao koji nam je bio u zadaći. Ja bih u kratkim crtama obrazložio rad Komisije vezano za dodjelu stipendija za 2018/2019. godinu hronološkim redom. U startu bih naglasio da Komisija u ovom sazivu Općinskog vijeća nažalost radi u veoma okrnjenom sastavu i uvijek je upitan kvorum Komisije. Radimo sa nekih 60 % svojih kapaciteta i moramo jedni druge kontaktirati i prilagođavati rad Komisije, tako da smo, zbog obaveza jednog člana Komisije, imali sastanak u 8 sati ujutro da bi imali kvorum. Komisija otprilike radi sa tri člana umjesto sa pet. Ja sam i prošle godine naglašavao i molio političke subjekte, iz kojih dolaze dva člana Komisije, da zamijene te članove, odnosno jedan član je veoma upitan, međutim nema ništa od toga. Znači 1. sastanak vezan za dodjelu stipendija za 2018/2019. godinu Komisija je održala 06.05.2019. godine i donijela je prijedlog općinskom načelniku za raspisivanje javnog konkursa za dodjelu istih. Općinski načelnik je to uvažio i raspisan je javni poziv. Po završetku te procedure Komisija se sastala i ukupno je prispjelo 27 aplikacija i Komisija je razmotrila da li su sve aplikacije dostavljene na vrijeme u skladu sa propisima. Taj sastanak smo imali 10.06.2019. godine, izvršili smo bodovanje i napravili preliminarnu listu. U skladu sa pravilnikom lista je istaknuta na oglasnoj ploči Općine, na web stranici Općine i na oglasnim pločama svih mjesnih zajednica, normalno u skladu sa pravilnikom da to bude što transparentnije. Kao i do sada ostavljena je mogućnost za studente koji su nezadovoljni da u roku od 8 dana ulože prigovor. Prigovor se, da podsjetim, ulaže Komisiji, a konačnu odluku donosimo mi kao Općinsko vijeće. Po isteku tog perioda od 8 dana sazvan je i 3. sastanak Komisije za mlade 21.06.2019. godine. Održan je, kako sam rekao, sa tri člana Komisije. Nije došao ni jedan prigovor na preliminarnu listu tako da smo predložili listu onakvu kakva je bila u preliminarnom obliku da ide kao prijedlog Općinskom vijeću. Liste su pred vama, a Komisija je donijela i određene zaključke. Mi smatramo da su ti zaključci opravdani, a vi procijenite da li jesu ili nisu. Prilikom rada ove Komisije kontaktira se kantonalno Ministarstvo za boračka pitanja. Tehnički sekretar i sekretar Općine ih kontaktiraju i traže ko je potpisao ugovor sa općine Doboj Istok od studenata za dodjelu kantonalnih sredstava da ne bi došli u poziciju da neko koristi sredstva iz općinskog budžeta i iz kantonalnog budžeta. S tim u vezi iz godine u godinu primjetili smo mi kao Komisija da je sve manje studenata iz općine Doboj Istok koji apliciraju gore prema Kantonu. Razlog je veoma jednostavan, gore su stipendije niže i po našim saznanjima su 80 KM i isplata tih stipendija je neredovnije nego što je iz općinskog budžeta. Nameće se zaključak da je logično da studenti apliciraju prema ovim općinskim stipendijama. S tim u vezi Komisija je donijela zaključak da u narednom periodu, a naravno to bi Komisija trebala da uradi prije raspisivanja stipendija za 2019/2020. godinu i da predloži Općinskom vijeću izmjenu pravilnika, ako Vijeće prihvati ove zaključke, da se uskladi visina stipendija općine Doboj Istok i visina kantonalnih stipendija, a govorimo u finansijskom smislu. Sada imamo situaciju da određeni broj studenata nije primio ni na Kantonu, a ni iz Općine stipendiju, a ja imam podatak, doduše nije validan, nije zvaničan podatak, da u Kantonu ko god aplicira i ispunjava uslove dobija stipendiju. To je jedan od zaključaka, odnosno prijedloga, kako god hoćete formulirati. Drugi prijedlog ili zaključak je da se prilikom kreiranja budžeta za 2020. godinu planira povećanje sredstava za stipendije u visini od 15 – 20 %. Treći prijedlog ili zaključak je da Komisija predlaže općinskom načelniku da iz budžetske rezerve izdvoji sredstva za stipendiranje studenta Mujić Edvina koji se nalazi na broju 16. na rang listi, obzirom da je razlika između 15 i 16. studenta 0,01 bod. Naglašavam ovaj student je izgubio pravo na stipendiju, jer mi dobijamo od Porezne ispostave radni angažman članova domaćinstva prijavljenog studenta i primanja i ovaj student je u 2018. godini radio u

komunalnom preduzeću i studira u Sarajevu i bio je određen broj mjeseci prijavljen, jer je radio kao komunalni radnik da bi nešto zaradio i njegova plata je prikazana kroz primanja i ušla je njegov prosjek. Komisija se do sada nije sreala sa takvim primjerom, on je iznalazio mogućnost da zaradi neke pare i jednoglasan prijedlog Komisije je i ako je u mogućnosti općinski načelnik da izdvoji tih 1.000 KM za ovog studenta. Ja sam zadovoljan što se tiče rada Komisije, a jedino je ovo nedostatak. Ja znam da informacija prođe, ali meni nije svejedno, jer postoje određeni rokovi, a ne može se kvorum da sastavi zbog jednog ili dva člana Komisije. Ako želite shvatite ozbiljno ovaj apel. Može se vidjeti ko je kandidovao te članove Komisije, jer nije u redu i nije korektno prema nama ostalim članovima Komisije, a jednostavno se može izvršiti zamjena. Ovo što ću reći je moje razmišljanje, ali mislim da i ostali članovi Komisije dijele moje mišljenje, da bi ovoj Komisiji trebalo ubuduće da imamo predstavnike, nije bitno iz koje političke stranke, a ne mora uopšte biti politički afirmisana osoba, iz reda studentske populacije. Znači trebalo bi da jedno ili dvoje članova Komisije da budu studenti. Da li je to moguće, ja smatram da jest i mislim da bi dosta bilo pozitivnije i unaprijedili bi još više rad ove Komisije. Mada i ovako ja nisam nezadovoljan radom ove Komisije.“

Semir Halilović, vijećnik SDA: „ Poštovani načelnice, predsjedavajući Općinskog vijeća, zamjeniče, poštovani gosti, kolegice i kolege vijećnici. Prvo što bih rekao je da se slažem sa Izom da ova Komisija dobro radi svoj posao inače, a dobro je uradila posao i ovaj put. Kada bi se išlo redom vjerovatno bi se moglo nabrojati, po mom mišljenju, 100 stvari koje su dobro uradili, ali ja imam jednu malu primjedbu. Kada je u pitanju ono što se očekivalo od Komisije, ono što se mora uraditi, to je urađeno 100 % kako treba, mada ne mora ni biti tako što nije bilo žalbi. Imali smo mi prošli puta i žalbi, ali su one sve bile neosnovane i tada je Komisija jako dobro uradila svoj posao. Kada su u pitanju zaključci ja imam nešto primjedbi, a i nekih mišljenja koja treba da navedu na razmišljanje Komisiju, a i nas sve ako već bude izmjena da se još bolje pripremimo. Kada je u pitanju ovo usklađivanje visine iznosa stipendije sa kantonalnom treba tu uzeti u obzir da se možda može djelimično obezbijediti kreditiranje. Pravilnikom da se uredi da se djelimično, ne cijela stipendija, kreditira, jer u tom slučaju postoji mogućnost da se ne smanjuje sadašnji iznos stipendije, ali da se stipendisti obavežu da će jedan dio stipendije vratiti. To je razmišljanje koje može pomoći Komisiji da još bolje napravi ovaj pravilnik. Takođe kada je u pitanju povećanje od 15–20 % mislim da bi to trebalo staviti na papir, pa vidjeti šta u slučaju smanjenja iznosa stipendije znači povećanje ukupnog iznosa, odnosno hoće li svi dobiti stipendije i hoće li to biti više nego što treba od prijavljenog broja kandidata. To nisu uopšte primjedbe samo moja razmišljanja da taj pravilnik uradimo još bolje nego što je sada. Kada je u pitanju prijedlog da općinski načelnik iz budžetske rezerve izdvoji sredstva za stipendiranje studenta Mujić Edvina koji je 16. na listi, ja generalno nisam za nekoliko stvari ovdje koje se dešavaju, a to je da se pomijera lista kada je u pitanju zaključak Općinskog vijeća, pa čak i zaključak Komisije. Nemoguće je napraviti idealan pravilnik i vjerovatno zbog toga senzibilitet Komisije je bio da pomogne još jednom studentu i to je u redu i to ja zaista poštujem. Međutim tada već ulazimo u domen nekih stvari koje pokušavamo da ispravimo, a koje nisu unesene u pravilnik i biramo na takav način studente, pa čak i ako se to radi o sljedećem na listi. Možda griješim, možda ovaj prijedlog i nije problem, ali ako ste vi već za to i ako ćemo danas pored liste od 15 studenata donijeti određene zaključke, odnosno prihvatiti zaključke Komisije, samo da napomenem svi zaključci Komisije su za mene izuzetno prihvatljivi, onda bih volio da ipak naš zaključak ne bude da se imenično pominje neki student, pa čak i njegovom pozicijom na listi, nego da se načelniku predloži, ukoliko ima mogućnosti da sagleda neke nove momente ili neke propuste koje smo napravili u pravilniku i da omogući svim studentima koji nisu dobili stipendiju, a ne mora to se zvati stipendija, nego jednokratna pomoć ili neki drugi način u skladu sa zakonom, da im se pomogne. Ja sam to govorio u pripremi za ovu sjednicu, ako je obrazloženje ovo 0,01, sljedeća studentica na listi ima razliku od 0,07 i to su zaista veoma male razlike. Nekada je neko na Vijeću govorio da treba napraviti pravilnik gdje će se omogućiti da ova razlika bude veća, ali je to jako teško. Pravilnik je takav kakav jeste, povuče se crta i kažemo imamo 15 studenata. Ne znam da li ste me razumjeli, ako bude zaključak da se podrže zaključci Komisije ja bih vas zaista zamolio neka ostane, a Komisija ima svoje pravo da predlaže ovako kako je htjela, ali da Vijeće to proširi da se ostavi mogućnost načelniku, ne samo iz budžetske rezerve, nego na bilo koji način koji je u skladu sa zakonom da pomogne ovim studentima koji imaju jako teško socijalno stanje. Možda je zbog tih uslova u kojima žive nisu baš dobri studenti ili nisu još došli do godine studija koja bi im dala taj neki određeni broj bodova. Ja sam tako gledao veliki broj studenata da je veća godina studija ušao bi u rang listu. Jako teško je napraviti pravilnik koji bi zadovoljio sve zato vas zaista molim da ne oštetimo ni druge, a na ovaj način ostavimo mogućnost načelniku da razmotri i ovog studenta koji se zove Mujić Edvin. Stvarno mi je

drago što ne znam o kome se radi i većinu studenata ispod crte ne znam, ali neke znam i logično je da možda nekada subjektivno sudimo.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim više prijavljenih. Tačka glasi usvajanje Konačne rang liste i mi u principu treba da se orjentišemo na ovo. Znači nama je Komisija predočila rang listu, a zaključci Komisije mogu biti u nekom daljem razmatranju pri pravljenu novih kriterija, ali mi sada imamo tačno zadatak da usvojimo rang listu, jer je u budžetu i rezervirano 15.000 KM za ovaj projekat. Rang lista od 15 taj projekat poklapa i za sve ostalo vjerovatno ćemo ući u veću raspravu.“

Kemal Bratić, općinski načelnik: „ Poštovani predsjedavajući, zamjenice, uvažene vijećnice i vijećnici predstavnici Policijske uprave, komunalnog, mediji esalamu alejkum i dobar dan. Da kažem da se slažem i sa Komisijom i sa profesorom Semirom smijati ćete se, jer se ne može sa svima slagati. Suština je u sljedećem. Bez obzira kako uradili mi otvaramo proces i kako god predložili staviti ćete mene u nekakav nezgodan položaj. Ja prihvatam da razmotrimo ove sugestije profesora i da vidimo ponovo sa Komisijom i da zadužimo moje saradnike da sjednu i da vidimo ako su socijalna primanja loša da pokušamo da pomognemo nekom od studenata. Mada je, ponavljam, to otvaranje procesa. Slažem se da se iznos stipendije za idući budžet poveća, jer nismo povećali par godina. Međutim nisam ja za to da se smanji iznos stipendije i neka ostane ovaj iznos i dobro je da naša djeca dobivaju. Mi se brinemo za našu djecu sa naše općine i ne moraju ni uzimati sa Kantona. Znaju oni sebe i izbodovati, pravilnik je dostupan svakome i ako ne mogu proći ovdje zašto gore ne apliciraju. Za mene je prihvatljiv i zaključak Komisije, a i zaključak profesora da ukoliko je opravdano i ako je u zakonskim okvirima da pomognemo određeni broj studenata. Da li će to biti iz budžetske rezerve ili nekog drugog konta dogovoriti ćemo se. Znači nije kasno da ja predložim, pa da stavimo i na septembarsku sjednicu. Bitno je, kao što predsjedavajući kaže, da se mi danas izjašnjavamo o rang listi, jer ona je izbodovana, uspjeh je broj 1. i ova socijalna strana. Smatram da je Komisiji bilo veoma teško i u potpunosti ih shvatam što su predložili ovo 0,01, a i ovaj 0,07 i po meni oba bi trebali dobiti. Nisam ušao u srž problema, ali ima socijalnih slučajeva kojima bih ja možda prije dodijelio stipendiju nego nekome kome je možda manje potrebno. To je veoma veoma teška odluka bila na Komisiji, ali evo i ja ću pokušati da vidimo šta se može uraditi, a naravno prihvatiti ću da pomognem našem studentu ukoliko je u zakonskom osnovu.“

Dr. Ferid Konjić, predsjedavajući Općinskog vijeća: „Ima li još diskutanata? Nema i dajem na izjašnjavanje Razmatranje i usvajanje prijedloga Konačne rang liste za dodjelu stipendija redovnim studentima dodiplomskog studija. Ko je za ovu Konačnu rang listu?

Glasanje: ZA – 15, PROTIV – 0, UZDRŽANIH – 0

Ad.7. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2018/2019. godinu.

Dr. Ferid Konjić, predsjedavajući Općinskog vijeća: „Dobili ste odluku i ima li potrebe neko da diskutuje? Ako nema, ko je za ovu Odluku?

Glasanje: ZA – 15, PROTIV – 0, UZDRŽANIH – 0.

Ad.8. Razmatranje i usvajanje Informacije o higijenskoj ispravnosti vode za piće i stanju vodoprivrednih objekata.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Hasan Hasančević, predsjednik kluba vijećnika SDA: „Pošto prvi puta izlazim sve vas selamim i pozdravljam. Imamo pitku i ispravnu vodu, međutim mi smo na proširenom klubu razmatrali ovo i ideja je još od prije da usvojimo jedan zaključak, pošto većina građana Doboj Istoka ima jedan dva ili tri vodovoda. Ako ste obratili pažnju od strane JZU Dom zdravlja se kaže da veliki broj domaćinstava u svojim objektima ima jedan vodosistem instalacija koji koristi vodu sa glavnog, kao i tzv. seoskih vodovoda, a u šahtima postoji jedan ventil za regulaciju. Ovo bi nam moglo praviti probleme i u

budućnosti. Znači da usvojimo zaključak da preko mjesnih zajednica i preko vlasnika vodovoda tzv. grupa građana, oni su neformalni, jer ja poznajem dobar broj tih ljudi i bit će teško, ali da svi razgovaramo da se ti vodovodi daju na upravljanje komunalnom preduzeću. Vjerovatno se ni komunalno preduzeće neće slagati sa tim u potpunosti, ali imamo menadžment sa kim treba da razgovaramo zbog sigurnosti vode, odnosno zbog higijenske ispravnosti. Ja odgovorno tvrdim, niko ne koristi dva sistema posebno lokalni, a posebno gradski i vode nam se miješaju tu u kućama, a vi znate kako se bakterije šire i kojom brzinom i do čega sve može doći. Da usvojimo zaključak i da krenemo mi kao Vijeće sa inicijativom, a dokle će to doći i kada će to završiti, mislim da ima potrebe za ovakvim djelovanjem.“

Kemal Bratić, općinski načelnik: „Ja nisam bio na zajedničkom klubu i ne znam kako ste se dogovorili i ja ću reći ono što ja mislim. Nemojte da donosimo zaključke koje ne možemo provesti, jer mi samo možemo sugerisati. Možemo sugerisati komunalnom preduzeću da uđe u razgovore sa vlasnicima. Ja ovdje mogu garantovati da od toga nema ništa. Ti ljudi koji su prije 30 – 40 godina napravili te svoje vodovode i draži su im od gradskog. Razgovarao sam ja sa njima i pokušavao i možemo samo sugerisati, jer zaključak je maltene obavezujući. Znači možemo sugerisati, jer to bi bila idealna stvar. Ja predlažem da sugerišemo komunalnom preduzeću da pregovara o preuzimanju i brizi vodovoda i odvajanju tih mreža, jer to je nama problem. Mi smo na prošloj sjednici Vijeća imali izlaganje tehničkog direktora, jedno dobro i kvalitetno izlaganje, gdje je pomenuo čak i svoju tetku i 700 m³ je otišlo u neki lokalni vodovod i to nam je problem. Problem zagađenja gradskog vodovoda su upravo ti lokalni vodovodi. Kada bi mi uspjeli, a nadam se da je to zakonski izvedivo, da se ti vodovodi odvoje i neka ima svaki domaćin za zalijevanje bašte ili nečeg drugog odvojenu česmu i za lokalni vodovod i za gradski i to je već pomak i uspjeh. Znači da ne može komunalno preduzeće održavati džaba bilo koji vodovod. Koliko ima vodovoda? 30 i čim pomenemo treba platiti onda se to odmah mijenja iz temelja. Tako da ja predlažem da ne bude zaključak, nego da se sugerišu komunalnom preduzeću da u narednom periodu obavi razgovore sa vlasnicima i da pokušamo da to ubacimo u jedan sistem kontrole. Ako oni nisu za to da to ide, oni tu vodu piju na svoju odgovornost. I ova sugestija je na neki način jedan pomak. Ne možemo donijeti zaključak, jer onda je to obavezujuće i onda će biti neozbiljan menadžment i direktor preduzeća, jer neće uspjeti u tome. Možda ima par vodovoda koji bi to rado dali, jer im je dozlogrdilo da se brinu o tome.“

Hasan Hasančević, predsjednik kluba vijećnika SDA: „Mi ćemo ovo prihvatiti u bilo kojoj formi ili zaključka ili sugestije, nije sporno, samo da se zna da ovo Vijeće ima informaciju i da građani kada se nešto desi ne mogu kriviti Vijeće za ono što su oni prouzrokovali i to je suština poruke koju ja želim da pošaljem danas odatle. Ja u ime kluba vijećnika SDA i u ime većine. To je suština i ja ne želim da odgovaram za nešto. Ja bih se stavio na raspolaganje u Klokočnici pošto znam dobar broj ljudi da razgovaram sa svima i da trošim dane i noći da se to riješi. Slažem se ako ne stavimo sve vodovode nismo ništa napravili. Jedan ako ostane i u njemu bude problem sistem je takav da se to širi munjevito brzinom.“

Dr. Ferid Konjić, predsjedavajući Općinskog vijeća: „Ja sam o ovoj tački diskutovao prije nekoliko Vijeća i odustao sam, jer sam shvatio da u suštini nema od toga ništa. Sada imam jedan konkretan prijedlog ako hoćemo razmotriti, ova voda košta 1 KM, a ova bi možda koštala 30 feninga i kada se pretvore u ekonomsku računicu, samo ako hoćemo. Imam konkretan prijedlog, jer to vjerovatno treba platiti i možemo platiti Domu zdravlja da izvrši redovnu analizu svih ovih vodovoda i imat ćemo sljedeće godine rezultate. Po ovome ova je voda ispravna i onda nemamo potrebe ništa dirati, ali sumnjamo. Ako već sumnjamo, imamo činjenice i svakog mjeseca neka Dom zdravlja uradi analizu svih ovih vodovoda, a to treba neko platiti i hajmo se mi obavezati da platimo to i sa sebe skidamo tu neku odgovornost. Ako vjerujemo ovim analizama ovi vodovodi su ispravni. Ja mislim da se mi ne ponašamo kako treba prema svom prirodnom bogatstvu, a rekao sam zbog tog što imamo viška vode imamo i ove sjeline. Znači imamo puno štete i plaćamo neku vodu 1 ili 1,20 KM umjesto da plaćamo 30 feninga i opet ćemo imati ispravnu vodu i imati više vode, a manje platiti. Ovo je konkretan prijedlog u pravcu ovoga što je Hasan govorio, a mislim da mi možemo naći sredstva da se Dom zdravlja obaveže da sve izvore koji su prisutni na našoj Općini, a koji nisu pod kontrolom, neka izanalizira i da imamo za sljedeću godinu rezultate i onda možemo poduzimati neke korake.“

Selmin Karić, vijećnik SDA: „Imamo mi tu više problema i ne treba bježati od njih. Svaki vodovod više od pet učesnika se smatra javnim vodovodom, odnosno javnim vodosnabdijevanjem i šta se dešava, to je

naša odgovornost i ne možemo bježati od toga. Mi moramo razmišljati u budućnosti o donošenju jedinstvene odluke na području općine Doboj Istok vezano za vodosnabdijevanje. Kome ćemo mi dati na upravljanje jednoj, dvije ili tri firme apsolutno to nema veze, ali moramo ići u tom pravcu o donošenju jedinstvene odluke o javnom vodosnabdijevanju na području općine Doboj Istok. To je na kraju krajeva naša odgovornost, zakonski je naša odgovornost po Zakonu o lokalnoj samoupravi i po Zakonu o vodama.“

Dr. Ferid Konjić, predsjedavajući Općinskog vijeća: „ Ima li još diskutanata? Nema. Dajem na izjašnjavaње ovu Informaciju. A možemo, ako se slažete, ići sa zaključkom da damo zaduženje Domu zdravlja da nam napravi analizu voda svih izvorišta u privatnom vlasništvu na našoj općini koja nisu obuhvaćena ovom informacijom, jer mi u ovoj informaciji nemamo stanje voda u ovim izvorištima. Ko je za ovu informaciju i zaključak?“

Glasanje: ZA – 15, PROTIV – 0, UZDRŽANIH – 0

Ad.9. Razmatranje i usvajanje Informacije o zloupotrebi narkotičkih sredstava sa prijedlogom mjera za suzbijanje istih na području općine Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata. Ima li potrebu predstavnik MUP-a šta da kaže? Ako nema, dajem na izjašnjavaње. Ko je za ovu informaciju?“

Glasanje: ZA – 15, PROTIV – 0, UZDRŽANIH – 0.

Ad.10. Razmatranje zahtjeva Mujić (Vesada) Edisa iz Klokočnice za davanje saglasnosti susjeda.

Dr. Ferid Konjić, predsjedavajući Općinskog vijeća: „ Dobili ste zahtjev i stav službe, tačku dajem na diskusiju. Ne vidim prijavljenih i dajem na izjašnjavaње. Ko je za realizaciju zahtjeva?“

Glasanje: ZA – 13, PROTIV – 0, UZDRŽANIH – 2.

Ad.11. Razmatranje zahtjeva Mujkić (Agana) Adila iz Klokočnice za davanje saglasnosti susjeda.

Dr. Ferid Konjić, predsjedavajući Općinskog vijeća: „ Isto je stanje, imate stav službe i tačku dajem na diskusiju. Ne vidim prijavljenih diskutanata. Ko je za?“

Glasanje: ZA – 13, PROTIV – 0, UZDRŽANIH – 2.

Na ovaj način smo iscrpili današnji dnevni red. Hvala vam na učešću u radu.“

Sjednica je završena u 10,55 sati.

ZAPISNICAR
Behara Hadžić

SEKRETAR
Omer Hadžić

PREDSJEDAVAJUĆI
OPĆINSKOG VIJEĆA
dr. Ferid Konjić

Službena zabilješka:

Zapisnik je usvojen na 29. redovnoj sjednici Općinskog vijeća Doboj Istok održanoj dana 28.09.2019. godine.

U Klokočnici, dana 30.09.2019. godine

Zabilješku sačinio
Omer Hadžić, sekretar Općine